

NO. SOALAN : 341

PEMBERITAHUAN PERTANYAAN DEWAN RAKYAT

PERTANYAAN : BUKAN LISAN

**DARIPADA : YB. DATO' TAKIYUDDIN BIN HASSAN
[KOTA BHARU]**

SOALAN :

YB. Dato' Takiyuddin bin Hassan [Kota Bharu] minta MENTERI PELANCONGAN DAN KEBUDAYAAN menyatakan apakah kerjasama yang diberikan oleh Kerajaan Pusat kepada Kerajaan Negeri Kelantan bagi menjayakan Tahun Melawat Kelantan 2016.

JAWAPAN: DATO' SERI MOHAMED NAZRI BIN ABDUL AZIZ,
MENTERI PELANCONGAN DAN KEBUDAYAAN

Tuan Yang di-Pertua,

Di bawah Rancangan Malaysia Ke-Sepuluh (RMKe-10 [2011-2015]) dan Rancangan Malaysia Ke-Sebelas (RMKe-11[2016-2020]), Kementerian telah memperuntukkan dana bagi menaiktaraf dan meningkatkan kemudahan produk-produk pelancongan di negeri Kelantan seperti yang dibangkitkan oleh YB. Di bawah RMKe-11, Kerajaan Pusat telah memperuntukkan sejumlah RM1 juta bagi Projek Peningkatan Kemudahan Pelancongan di kawasan Pantai Geting, Tumpat, Kelantan dan di bawah RMKe-10, Kerajaan Pusat telah memperuntukkan sejumlah RM18,414,700.00 bagi pelaksanaan projek-projek pembangunan di negeri Kelantan. Di antaranya adalah seperti berikut :

- i. Pembangunan kemudahan pelancongan di Tambatan diRaja, Kota Bharu, Kelantan (Fasa II) (RM10 juta).
- ii. projek membina dan menaik taraf kemudahan pelancongan di Pasar Besar Siti Khadijah, Kota Bharu, Kelantan (RM2.4 juta).

Pelbagai program secara kerjasama pintar dengan pelbagai agensi kerajaan dan swasta untuk memperkenalkan lokasi-lokasi pelancongan menarik di Kelantan sedang dirancang seperti program Berbasikal Jelajah 8 Daerah, perlumbaan perahu panjang tradisional, kembara eko-pelancongan dan lain-lain lagi.

Pejabat Kementerian Pelancongan dan Kebudayaan Negeri Kelantan juga akan mempergiatkan program peringkat akar umbi untuk meningkatkan minat para belia untuk bergiat di dalam industri pelancongan terutama dalam sektor perhotelan dan perkhidmatan. Antara program yang sedang dirancang ialah pertandingan lukisan mural dan pertandingan ukiran pensil kayu.

Pejabat Kementerian Pelancongan dan Kebudayaan Negeri Kelantan juga tidak ketinggalan didalam usaha untuk mempromosikan program pengalaman Homestay Malaysia / inap desa di Negeri Kelantan melalui kerjasama pintar dengan IPTA seperti UKM-CESMED, USM dan UMK. Program-program pembangunan Homestay seperti *makeover Homestay*, 1MG1MC dan lain-lain sudah semestinya akan dapat membantu mempromosikan *homestay* setanding dengan *homestay-homestay* lain yang telah berjaya, sekaligus dapat meningkatkan ekonomi masyarakat luar bandar.

Dari sudut pengiklanan, Kementerian ini melalui Tourism Malaysia telahpun menyediakan kreatif-kreatif iklan bagi pasaran Amerika, Eropah dan Russia yang memaparkan aspek kebudayaan di Negeri Kelantan seperti pembuatan Wau di Kota Bharu, kehalusan seni bot nelayan di Pantai Sabak, seni kraf perak di Kota Bharu dan seni Dikir Barat di Pantai Geting. Di samping itu, Tourism Malaysia juga mempromosi Negeri Kelantan dalam rangkaian *TV National Geography Channel* berdurasi 30 minit yang dihoskan oleh En. Nick Saxon yang memaparkan aspek kebudayaan dan kehidupan tradisi masyarakat Negeri Kelantan. Program ini telah ditayangkan di rangkaian TV global *Nat Geo* di seluruh dunia pada tahun 2015.

Kementerian Pelancongan dan Kebudayaan Malaysia, melalui Pejabatnya Kementerian Pelancongan dan Kebudayaan Negeri Kelantan sentiasa mengadakan pelbagai program, mesyuarat dan perbincangan dengan Kerajaan Negara Thailand bagi mengukuhkan hubungan dua hala dengan wilayah di sempadan seperti Wilayah Narathiwat untuk menarik lebih ramai pelancong dari Negara Thailand mengunjungi lokasi-lokasi menarik di Malaysia terutamanya di Kelantan. Antara program yang telah dijalankan adalah pertandingan sukan dan kebudayaan antara penggiat industri Negeri Kelantan dan Wilayah Narathiwat pada 22 Januari 2016 yang lalu.

Pejabat Kementerian Pelancongan dan Kebudayaan Negeri Kelantan juga telah menganjurkan acara Festival Loy Kratong dengan kerjasama Persatuan Wanita Negeri Kelantan pada tahun 2015 yang berjaya menarik seramai 1000 orang pengunjung dari dalam dan luar negara. Sehubungan dengan itu, Pejabat Kementerian Pelancongan dan Kebudayaan Negeri Kelantan sekali lagi akan menganjurkan acara Festival Loy Kratong dengan kerjasama Persatuan Wanita Negeri Kelantan pada tahun ini dengan bantuan peruntukan sebanyak RM50,000.00.

Sekian, terima kasih.

SOALAN (342)

**PEMBERITAHUAN PERTANYAAN
DEWAN RAKYAT, MALAYSIA**

PERTANYAAN : BERTULIS

**DARIPADA : Y.B. DATO' TAKIYUDDIN BIN HASSAN
[KOTA BHARU]**

SOALAN :-

Y.B. DATO' TAKIYUDDIN BIN HASSAN [KOTA BHARU] minta MENTERI KESEJAHTERAAN BANDAR, PERUMAHAN DAN KERAJAAN TEMPATAN menyatakan dengan terperinci statistik projek pembinaan Rumah Mampu Milik yang dilaksanakan oleh Kerajaan Pusat di seluruh Malaysia.

JAWAPAN :-

Tuan Yang di-Pertua,

Untuk makluman Ahli Yang Berhormat, Kerajaan telah meletakkan sasaran pembinaan 1 Juta Rumah Mampu Milik di seluruh negara untuk tempoh 5 tahun bermula dari tahun 2013 hingga 2018. Pembinaan ini akan dilaksanakan oleh pelbagai agensi Kerajaan Persekutuan dan Negeri yang berkaitan dengan sektor perumahan. Bagi perumahan di bawah Kementerian Kesejahteraan Bandar, Perumahan dan Kerajaan Tempatan (KPKT) sehingga bulan September 2015, KPKT telah berjaya menyiapkan sebanyak 23.4% iaitu 14,200 unit rumah, manakala 30.5% iaitu 18,533 unit rumah masih dalam pembinaan dan baki 28.4% iaitu 17,289 unit rumah masih dalam pelbagai peringkat perancangan. Secara keseluruhan, pelaksanaan KPKT telah mencapai 82.3% daripada keseluruhan sasaran bagi pembinaan Rumah Mampu Milik yang dijanjikan oleh kementerian dan baki sebanyak 17.7% akan diteruskan pelaksanaannya.

Bagi keseluruhan pelaksanaan 1 Juta Rumah Mampu Milik yang dilaksanakan oleh kementerian dan agensi yang berkaitan dengan sektor perumahan, sehingga bulan September 2015, Kerajaan telah menyiapkan sebanyak 16.1% (194,779 unit rumah), manakala 15.4% (185,742 unit) masih dalam pembinaan dan 29.79% (360,205 unit) masih dalam pelbagai peringkat perancangan. Baki 38.7% (68,299 unit) lagi akan diteruskan pembinaannya sehingga tahun 2018.

Kementerian Kesejahteraan Bandar,
Perumahan dan Kerajaan Tempatan

April 2016